



Protocol

dalla radunonza generala ordinaria dalla Pleiv Tujetsch, gliendisdis, ils 8 d'avrel 2024 allas 20.00, en sala Cristalla en Halla da sport e cultura Dulezi a Sedrun.

Tractandas

1. **Avertura e beinvegni**

Al temps fixau sa il president dalla Pleiv Tujetsch, Arthur Caduff, beneventar 33 persunas alla radunonza da pleiv pigl onn da gestiun 2023. En special sa ed astga el beneventar il vicari general digl uestgiu da Cuera, signur Peter Camenzind. L'invitaziun alla radunonza hagi giu liug tenor obligaziun diesch dis avon il termin e damai ch'ei dat negins giavischs da midadas ni completaziuns dallas tractandas, sa el arver ufficialmein la radunonza. Plinavon ha mintga casada retschiert il program annual 2023 per prender investa e sepreparar silla sera dad oz.

Il president sa comunicar ina suletta perstgisa e quei da Rita Berther, Rueras

2. **Elecziun dad in dumbravuschs**

Sco dumbravuschs vegn Marcel Soliva, Sedrun, eligius.

3. **Approbaziun dil protocol dalla radunonza generala dils 27 da mars 2023**

Il protocol redigius digl actuar e vicepresidente Tarcisi Hendry, vegn approbaus unanimeschein cun admetter in engraziament per la redacziun.

4. **Rapport annual dil president dalla pleiv**

Dil rapport annual dil president Arthur Caduff, han tuts saviu prender investa el rapport annual 2023. Dalla discussiun negin che fa diever.

5. **Rapport annual dil Cussegl pastoral**

Medemamein han tuts saviu consultar il rapport annual dallas co-presidentas dil Cussegl pastoral Tujetsch, Lucia Giossi ed Imelda Monn. Era cheu crodan neginas objecziuns e damondas. President Arthur engrazia per la lavur digl entir Cussegl pastoral en favur d'ina buna pastoraziun ella pleiv.

6. **Rendaquen, rapport dils revisurs ed approbaziun dil quen 2023**

Cassier Primus Deragisch, Bugnei, repassa il quen dalla pleiv e da nossas treis baselgias cun far attents sin expensas ed entradas specialas. Dils quens annuals dallas capluttas ha mintgin saviu prender investa el rapport annual.

En num dils revisurs da quen pren Linus Vincenz, Rueras, il plaid. Il rapport seigi publica el rapport ed ei basegni neginas amplificaziuns da quel. El engrazia per la buna lavur dil cassier ed admetta in compliment pil rapport annual. Il niev sistem da contabilitad seigi secumprovaus e possibiliteschi ina buna survesta dallas finanzas dalla pleiv. El engrazia al cassier pigl engaschi ed ils revisurs recamondien dad approbar il quen 2023 cun dar scarica all'entira suprastonza. Suenther che neginas damondas setschentan ord il miez, vegn il quen acceptaus unanimeschein cun engraziament al cassier e cun dar scarica als responsabels.

7. **Program da lavur 2024**

Il president presenta las investiziuns previdas pigl onn 2024 en las capluttas e baselgias e casa pervenda.

- Il sistem da serrar automaticamein vegn installaus ella caplutta da s.

Leci/Cavorgia ed ellas baselgias da Rueras e Sedrun, ils cuosts muntan a rodund 2500 frs. per object. Cun quellas installaziuns ein tuttas capluttas endrizzadas cul sistem, cun excepziun da s. Brida e s. Bistgaun.

- Il vestgiu dalla statua da Nossadunna sigl altar principal ella caplutta da Zarcuns ha pitiu ed ei sesblihius. Entras ina persuna dil fatg vegn quella examinada e lu priu la decisiun co intervegnir ed aschia procurar per in bien migliurament ed ina pli biala paret dil vestgiu e Nossadunna. Ils cuosts calculai ein rodund 5000 frs.

- Previu ei in migliurament visual entuorn la casa pervenda veglia ella Via Spinatscha. Cuosts 3000 frs.

- La lavur da garanzia per la fassada el vest dalla caplutta da s. Onna duei sepudentamein era vegnir executada. Quei sco risposta sin ina objecziun ord il miez dils radunai.

Investiziuns en vesta

La suprastanza ha previu da schar far studis e ponderaziuns pertuccont ils scaldaments dallas duas baselgias, Sedrun e Rueras.

8. **Approbaziun dil preventiv 2024**

Cassier Primus Deragisch presenta il preventiv pigl onn 2024. Ton entradas sco expensas ein ordinarias cun mudestas differenzas ed excepziuns e cumparegliablas cugl onn precedent. Las entradas schaijan ella summa da 364'000 frs. e las expensas fan ora rodund 272'500 frs. Aschia seresulta in gudogn da 91'540 frs.

Il preventiv 2024 vegn acceptaus unanimamein entras ils presents.

9. **Fixar il pei da taglia 2024**

La suprastanza ed ils revisurs da quen proponan alla radunonza generala da fixar il pei da taglia sco suonda:

Per igl onn 2024 duei il pei da taglia restar sco per 2023 sin 15% digl importo dalla taglia sempli dil cantun.

Ord il miez dils presents vegn la proposta da ponderar da reducir il pei da taglia pigl onn 2025. Cassier Primus fa attents che la pleiv hagi avon entgins onns alzau il pei da taglia per retscheiver dalla Baselia Catolica Grischuna il sustegn finanziel annual. Senza quel muncassien rodund 60'000 frs. ella cassa. Ord quella vesta desista il petent da far ina proposta.

Entras las extradadas dalla baselia ch'ei era carschidas tier nus e vegnan a cuntinuar, sesminueschan las entradas, era in bien motiv da restar il mument tiels 15%.

Plinavon vegn fatg attent ord il miez dils presents, en connex cun las casas pervenda, da promover per quellas il scaldament solar. Era per las baselgias fuss ei cunvegnent da far studis en quella direcziun cun plazzar tablas fotovoltaicas sils tetgs. La suprastanza pren bugen encunter quels impuls.

Unanimamein vegn la proposta acceptada da laschar il pei da taglia sco tochen dacheu.

10. **Elecciuns**

En elecziun crodan uonn vicepresidente/actuar e cassier. Ils suprastonts Tarcisi Hendry, Sedrun e Primus Deragisch, Bugnei, stattan vinavon a disposiziun ella suprastanza da pleiv e vegnan omisdus eligi cun in ferm applaus.

Mudest Venzin ha abdicau sco revisur-suppleant. President Arthur Caduff engrazia per siu engaschi ella pleiv. Ord il miez crodan neginas propostas e la suprastanza seporscha da far retschercas per in revisur-suppleant.

Il Cussegl pastoral ha stuiu prender encunter duas abdicaziuns ellas persunas dad Ursulina Cavegn, Camischolas, e Maria Barla Riedi, Gonda. Il president engrazia ad ellas per siu grond engaschi el ravugl dil cussegl e dat il plaid alla co-presidenta Imelda Monn, Rueras, per far las elecziuns.

Ella engrazia alla suprastanza, als plevons sur Alexi Manetsch, sur Giusep Venzin, sur Mathew Kurian, Mustér, als paders dalla claustra, al catechet Stefan Bolli, al menader dalla grupp liturgica Marcus Munsch ed agl organist Claudio Simonet. Ella menziuna era las sortidas dil Cussegl pastoral e deplora la sperdita da Hubert Venzin ella grupp liturgica. Il mument seigien els aunc tschun persunas el cussegl. Ella regorda ch'avon 34 onns cu ella seigi entrada el cussegl dumbravi quel 15 persunas che representavien tuttas spartas pusseivlas dalla populaziun indigena. Per cletg segidien aunc pliras gruppaziuns, sco per semeglia las dunnas.

Ella sa comunicar ch'ellas duas co-presidentas hagian fatg retschercas e publicau in inserat ella Tuatschina, mo survegniu neginas annunzias, ton ch'ellas stoppien cuntinuar cul diember da commembers e commembras actual. Ellas vegnien denton a far vinavon tutta breigia d'anflar persunas che s'engaschien per la baselgia el cussegl.

Il president engrazia allas duas co-presidentas ed agl entir Cussegl pastoral per la buna lavur en favur dalla pastoraziun ella pleiv. Ei seigi da lur vart sco era da vart dalla suprastanza da far tutta breigia d'anflar persunas el cussegl.

11. **Orientaziuns**

Informaziuns generalas

- Il president communicescha ch'il plevon sur Mathew Kurian, plevon a Mustér, seigi danovamein vegnius nominaus per in onn sco plevon-administratur dalla Pleiv Tujetsch.
- A S. Leci ha Margrith Cavegn, Sedrun, abdicau e nus vein saviu remplazzar ella cun Nicole e Severino Solér, Cavorgia. Il president engrazia a Margrith Cavegn per siu engaschi duront plirs onns ed engrazia medemamein als novs calusters da Cavorgia giavischond bia plascher e cuntentientscha.
- A Tschamut ei dunna Barbara Hendry sereratga digl uffeci da calustra. Dunna Roswitha Monn surpren, sper la calustaria da Selva, aunc il pensum da calustra a Tschamut. President Arthur engrazia, ton alla partenta calustra, sco alla nova pigl engaschi en favur da s.Clau.
- Hubert Venzin ha bandunau la grupp liturgica, quei suentar biars onns dad engaschi e prospereivla lavur ella organisaziun e preparaziun e sco menader dils survetschs divins dil plaid. El ha giu in bien maun en caussa e preparau buns survetschs divins dil plaid cun profunds e bials plaids, cun devoziusadad e sempladad e bein capeivels per parochianas e parochians. Il president engrazia en num da tuts per quei oreifer engaschi per la pastoraziun.

Caluster da s. Vigeli

Sin la fin dil meins zercladur han ils calusters da s. Vigeli, Sedrun, Marianna e Sep Andriu Monn abdicau. Scochemai seigi la suprastanza semessa alla tscherca. Ella Tuatschina ein in scriver ed in inserat vegni publicai. Plinavon ein numerusas persunas vegnidadas dumandadas. Ins sappi era metter avon ch'in team da plirs ni pliras funcziuneschi sco calusters ni calustras.

Plinavon seigi la situaziun da lavur sco caluster midada bravamein: a s.Vigeli han buca pli liug tons survetschs divins sco antruras; ils rusaris vegnan a curdar; l'installaziun dad arver e serrar automaticamein vegni installada; pil tucclar vegn planisau dad installar in sistem digital via app; la paga ei segiramein andanta alla lavur.

La pintga speranza d'anflar enzatgi ei aunc avon maun. Il proxim temps ei decisivs e mintgin dalla pleiv sa esser gideivels cun silmeins sustener e segidar cun cussegl.

Collaboraziun regiunala

La fin digl onn 2021 ei seconstituida ina grupp da lavur cul num Collaboraziun Pastoraziun Sursassiala e quei cun representants /as da mintga pleiv, Medel/Lucmagn, Mustér e Tujetsch.

Davart las activitads dalla grupp plaida il protocol dalla radunonza generala dils 27 da mars 2023. Igl onn 2023 ha ei dau 5 sedutas, da quellas duas cun la grupp, duas cun la grupp preparatorica cun treis dels e lu ina d'informaziun per tuttas treis suprastonzas. Sper la materia generala da collaboraziun vein nus structurau cun in organigram igl avegnir e process en treis fasas. En fasa in essan nus actualmeins, la fasa dus duei survegnir in Cussegl pastoral ni organisar cussegls, ni gruppas pastorales en mintga pleiv. En la tiarza fasa ei la finamira dad haver in collaboratur /a pastoral /a che s'engascha per la pastoraziun ensemen cul plevon. En mira stat negina fusiun dallas treis pleivs, denton ina regiun pastorala. In vischin s'exprima cun ina constataziun critica e manegia da buca mo empruar da formar novas purschidas, mobein schazegiar las purschidas tochen oz. Dalla suprastonza suonda la suandonta posiziun: Quei che funcziunescha oreifer entochen uss, duei restar vinavon ina part dallas activitads pastorales.

Orientaziuns dil Cussegl pastoral

Imelda Monn, co-presidenta, engrazia als commembers /as dil cussegl per lur engaschi. Ella ei plena da speranza che tut possi cuntinuar en favur d'ina buna pastoraziun, quei cun agid da tuts parochians e tuttas parochianas.

12. **Varia**

- Sur vicari general, Peter Camenzind, pren il plaid e sedrezza als parochians presents. El engrazia per l'invitaziun. El seigi impressiunaus dalla lavur ed activitad dalla pleiv. El seigi aunc mo dapi cuort temps vicari e siu èr seigi fetg gronds, mo a Cuera hagien nus il cletg d'haver in bien pastur egl actual uestg Joseph Maria Bonnemain.

El ei staus varga 30 onns plevon el cantun Uri. Per la pleiv giavischa el forza ed el stemi fetg la lavur dalla pleiv da Tujetsch. Las schanzas seigien bunas – mo il mument seigi veramein in temps da midada e restructuraziun. Perquei: Hagies fidonza!

- Ord il miez vegn fatg attents sil trest maletg en baselgia da s.Vigeli il di dalla s. communiun, Dumengia alva. Neginas fluras hagien dau tempra festiva ed in maletg plascheivel da fiasta. President Arthur pren encunter quella critica e vegn, schegie gia intervegniu, aunc inagada a tschintschar cullas responsablas.

- President Arthur Caduff fa aunc ina communicaziun en atgna caussa. Siu uffeci da president dalla pleiv mondi a fin cun la proxima radunonza generala la primavera 2025. El vegni buca pli a star a disposiziun per ina ulteriura perioda.

Terminaziun

President Arthur Caduff engrazia als dus consuprastonts per la buna collaboraziun, engrazia a tuts per la preschientscha alla radunonza ed interess pils fatgs dalla pleiv e giavischa in bien retuorn a casa. Bugen envida el ussa tuts ad in sitg ed ina paterlada el corridor dalla sala e siara la radunonza generala.

Publicau cun resalva dall'approbaziun dalla radunonza generala 2025.